

## Achtunnachzisch

Isch kenn ooner der ooner kennt, der in dem Monat Februar achtunnachtzisch Johr alt werrd. Unn der mett Nome Kunrad hott mett oom, der Fritz haaße dut unn im Februar genau su ald werrd, telefoniert unn hodden gefroochd, wasser ferr e Gefiehl hott, su enn Gebortsdaach mett emm hohe Alder unn donn noch meddere Schnapszahl feiern ze kenne.

Doo hädd de Fritz ze Antwort gewwe: Also gefeiert werrd emol nitt, awwer su gons klar kumm isch mett dene vier Ring nitt.

Ei Fritz, was donn ferr vier Ring?, hott doodruffhie de Kunrad gefroochd.

Doo seet de Fritz: Nemm derr emol enn Bleistift unn enn Zeddel unn mol derr die Achtunnachzisch uff. Gugg derr die Zahl genau oo unn donn werrsde seh, dass aus vier Ring gemachd iss.

Enn Aacheblig, hott de Kunrad gesaad, hott sisch enn Zeddel unn enn Stift geholld unn hott die Zahl Achtunnachzisch uff de Zeddel gemold. Donn frächderr de Fritz: Unn jetzt?

De Fritz seet dodruffhie: Siehsde dess nitt? Dess sinn doch genau die vier Ring, die aach uff jedem Audi-Audo ze sehe sinn.

De Kunrad moont: No ja, e bissi onnersders sinn die Audi-Ring schunn, die sinn doch ooner in de onnern oigehängd. Awwer was iss demett?

Doo flissderd de Fritz: Waaßt du, was Audi haaße dut?

De Kunrad druff: Wie haaße dut? Ewe Audi.

De Fritz hott weider geflissderrd: Awwer Audi iss ladeinisch unn heeßt uff Deutsch Horch.

De Kunrad hott de Kobb geschiddeld. No ja, dess muss merr nitt wisse, odder?

Jetz hott de Fritz ee bissi lauder gebabbeld: Ja, unn dess iss dess was mir Gedonke mache dut: Dass die Achtunnachzisch mett dene vier Ring uns dess ze saache hawwe: Horch! Unn wennde dess Wort heerst werrsde doch uffmerksam, odder?

De Kunrad hott omm Telefon gesunge: Horch was kommt von draußen rein, hollahü, hollahoo!

Doo hott de Fritz ins Telefon gekrische: Heer uff ze singe, du Dollbohrer, die Sach iss ernst. Unn donn seet de Fritz noch unn dess gons normal: Awwer recht hosde, ess kimmt von drauße ebbes uff uns zu, was dess iss, dess waaß isch noch nitt, awwer ess iss bestimmt nix Gutes. Unn desdeweese kumme mir die vier Ring vunn dere Achtunnachzisch rischdisch unheimlich vor.

Als isch vunn dem Telefongebabbel zwische dem Kunrad unn dem Fritz geheerd habb, doo habb isch gedenkt: Was su Alde monschmol ferr Gedonke hawwe, unn denk noch: Dess iss doch was Gutes, wenn su ahle Köbb noch su Spinnereie produziern kenne.